

春秋說畧

春秋說畧敘

吾鄉樸茂甲天下自先民習誦者不設已見循循傳注之中而相與守之余於其間私有疑或獨喜向郝子恂九問焉恂九好學覃思余纔少其二歲而自視駸駸望之寥廓顧不余鄙夷間商榷及之今年夏告余春秋說成將假以觀嚴霜朝隕伯氏彫喪重以人事之累蘭胝燕趙再反而歲行盡憂能傷人廢書而歎恂九亟來視因出春秋說爲慰曰是可塞悲視其書本之以慎而要之以通慎於經故傳可熟也通於理故例可獨也手披口誦曉夜不能息蓋一月得四十五日業未及卒而恂九愛子一女殤於痘童烏不秀悵悵不可爲懷余無以慰之還慰之以春秋說嗚呼更數十百年學徒有稱郝氏春秋者吾鄉之榮余其與焉而余與恂九之哀樂後孰知之乾隆壬子臘月同學年

廷伯筆

春秋難說也立乎定哀以指隱桓隱桓遠矣立乎今日以指定哀定哀又遠矣古有說者左氏以事公穀以義胡氏以文說以事者博說以義者約說以文者繁其敝也博而駁約而膠文而蔽然則奚從皆可從也古之說者多矣就其善者亦宜然也或事同而文異或文同而義殊或孤立而無援或比肩而有耦或顯義達情或微文見義此皆可說者也不以日月說不以名爵說不以書王不書王稱天不稱天說凡所說者質而已非有文也事者有說者也則不說義者有說者也無多說經所無者不能說也經所有者不具說斬明大義而止猶未知當否也凡說之敝駁而不博膠而無約蔽而不文乾隆壬子孟夏晦日郝懿行自敘

是編自壬子初脫藁越明年以內艱廢業逮乙卯歲復加訂

正增以十例爲第二纂今年秋讀膠西法氏春秋取義測因
檢是編重加校定爲第三纂先是己未庚申間紀文達公引
余說春秋遂觀是編深加嗟賞且曰吾覽春秋無慮百數十
家惟茲能剗盡千秋藤葛欲爲敘以梓行余退讓未遑也未
幾以外艱歸歲癸亥復來都門而公以抱疴不時見比今年
正月公以疾薨屬負茲時與汪兄銳齋言猶以未及作敘爲
憾嗚呼公可謂好學也已篇中隱三年君氏卒從顧氏曰知
錄之解是公所親定也因錄其語以誌知音之感云嘉慶乙
丑八月望後一日郝懿行識

春秋說畧例言

一曰春秋不敢褒貶天王王者天下之共生臣子之君父也春秋之時諸侯彊大夫僭陪臣干政於是孔子修春秋書王法道名分上以尊天子達王事焉今日王不稱天文乃是貶是身自爲僭何以責天下之僭乎故愚以爲說春秋者明臣子之義廣忠孝之心當自不敢褒貶天王始

二曰說春秋者不得妄生褒貶春秋聖人之書簡易明白廣大精微義具言中情餘文外讀書承學之士不過依文求義粗通大旨而已於聖人之心蓋不可以道里計也今自說春秋者張大其辭如云一字之褒踰於華袞之贈片言之貶過於蕭斧之誅然則春秋本簡易說者自以艱深滑之耳且所謂褒貶者左有左之例公有公之例穀有穀之例胡又有胡之

例而此諸家之例又斷斷不能相通我不識春秋一句之文何故有如許不能相通之例且彼所謂例者非自孔子口授而筆傳也直以其意造爲之耳朱子譬之命格是人所作非從天下斯乃通人之論愚以爲春秋無褒貶說春秋者有之耳春秋直書其事褒貶自見如書天王使宰咺來歸惠公仲子之賵直著秋七月有此事而已此事不須傳說可知爲非禮之事便是聖人所以垂教處更不須問此一句中何字是褒貶

三曰說春秋者好於經所無處尋褒貶春秋皆實錄也其多一字少一字皆事實如此不得不然非夫聖人意爲增減也如書公及邾儀父盟于蔑此實公及不得不稱公也又書及宋人盟于宿此實非公及不得稱公也據事直書何等明白又

如書爵書人皆實錄也書爵者君書人者大夫

按書爵是君書人是大夫

獨至執諸侯則謂不繫

於稱爵稱人當更詳之

何等明白今自說者曰不稱公者沒

公也又曰此君也貶人之夫君也可貶而人之然則人也亦可褒而君之乎本有公者既可削而沒之然則本無公者亦可增而有之乎如書諸侯盟于扈亦可變而書公及諸侯盟于扈乎以無爲有以虛爲實何以爲春秋

四曰春秋多闕文昔人云今之春秋非皆聖人親筆蓋傳授遞更失其真者或多矣左氏經文近古乃自傳中抽出者公穀二經初皆口授未書竹帛是以闕誤頗多王安石不喜春秋詆爲斷爛朝報正謂此耳然其脫文誤字以義推之今皆大畧可見如桓之篇春正月無王不書秋冬又如寔來及處父盟之類皆是也今自說春秋者好於闕文尋褒貶正月無王

不書秋冬則以爲削之寔來及處父盟則以爲貶之夫闕文
聖經之不幸也然文雖闕而義可尋不幸之中猶有幸焉至
於汨之以傳說淆之以褒貶一若闕誤爲聖人有意爲之者
支離破碎穿鑿附會此則聖經真不幸也已

五曰春秋經文當從左氏左氏記事近古似非鑿空爲之者其
於經文亦較完善且公穀二經與左氏異者不過人名地名
之類非大義所關昔朱子刻四經文字於漳郡春秋經一從
左氏蓋以此與然其間不無脫誤賴公穀二經而明者亦有
矣今斷以經從左氏左氏闕誤乃從公穀如紀子帛吳人郢
之類是皆異文不可讀者也單伯送王姬以逆爲送次于鼂
北作曹伯城邢又作曹師會于承筐稱叔仲彭生伐邾又稱
叔彭生是皆異文不可通者也上書齊高固來逆叔姬下書

子叔姬是闕文無其義者也諸如此類參用公穀以闕關說
其三經竝誤或俱闕無從考正則一仍其舊

六曰左氏深於經以其言褒貶少也先儒謂左氏史學公穀經
學竊謂不然春秋聖人之筆意思平厚安得每書一字卽有
許多褒貶公穀說經乃字字求褒貶夫字字求褒貶乃經生
險薄之習非聖人意也左氏則異是但敘本事令人讀之褒
貶自見往往得聖人渾厚之旨惟其間傳聞異辭是非多謬
如稱族尊君命舍族尊夫人之類支離妄說稱君君無道稱
臣臣之罪之類謬戾背經此則其蔽也其曰春秋之稱微而
顯志而晦婉而成章盡而不汙懲惡而勸善此言亦非公穀
所及公穀之意往往綜覈名實及尋文究義妄立褒譏卒至
名實顛倒樊然淆亂此說經求深之過也故愚以爲左氏爲

史而經明公穀爲經而經蔽昔張大亨以春秋義問蘇氏軾
軾荅書云春秋儒者本務然此書有妙用學者罕能領會多
求之繩約中乃近法家者流苛細繳繞竟亦何用惟左丘明
識其用終不月盡言微見端倪兆欲使學者自求之
見蘇軾雙溪集
氏此言近得其實

七日說春秋者好緣傳生義不顧經文及說不去則寧屈經而
伸傳終不肯舍傳而從經如趙盾許止之事按之經文書法
本無可疑乃爲說曰盾亡不越境止坐不嘗藥遂令千載而
下都欲解免二賊此尤害義傷教之顯然者而經生家猶謂
傳未可廢夫傳至悖理害經而猶謂未可廢然則經顧可廢
乎春秋誅亂賊此尤聖人垂世翼教之大端今按三傳往往
故入人罪輕出人罪如盜殺衛侯之兄水不知孰誰而必實

其人曰齊豹也鄭伯髡頑書卒而必證其事曰弑也夫弑而書卒是巨姦漏網矣豹而書盜得不令鬼哭含冤乎竊謂說經當一以經爲主傳與經合則知其必可信也傳與經違則知其不可從也以此求之三傳孰爲得失必有能辨之者范武子曰傳以通經爲主經以必當爲理三傳殊說擇善而從既不俱當庸得不竝舍以求宗據理以通經又曰雖我之所是理未全當安可以得當之難而自絕於希通哉此言可爲治經者法

八曰春秋刑書也刑書之例一成不移故法必行而人知畏今自春秋之例朝令夕更既云君弑賊不討不書葬而蔡景公書葬又云君子辭也大夫盟諸侯既云大夫仇而諸侯之大夫盟袁僑又曰大夫張也及宋人盟則曰微者及齊高傒盟

則又曰公也然則春秋一萬八千言徒供舞文之吏顛倒是非播弄口舌耳惡足爲聖人垂教之書乎三傳之中左氏例差簡公穀則繁矣胡氏又加繁然輕重任情紛更百出所謂法令滋章者也近日方望溪乃有春秋解自以爲頗得其要領然蒙意觀之其於新舊諸例過而存者尙多矣故愚以爲治春秋者當如漢高帝三章約法不當如狙公賦芣朝四暮三

九曰春秋聖人義理之書本不待傳而明如必待傳而明則是春秋不足於經也且聖人著經時寧知後世有傳乎經待傳而明者十之一不待傳而明者十之九其因傳而汨者十之五六矣如鄭棄其師梁亡之類是必待傳而明者也上書狄入衛下書諸侯救邢則知入衛之後禍又及邢矣上書戍鄭

虎牢下書楚公子貞救鄭則知戍鄭之邑所以難鄭矣如此之類是不待傳而明者也經言晉人秦人伐鄭傳言晉侯秦伯經言齊宋江黃盟黃傳言諸侯皆來至吳楚稱人則爲進之齊晉稱人又爲貶之如此之類是經因傳而汨者也以此求之思過半矣

十曰比事屬辭春秋教也何謂比事事同相比事異權比如救邢救徐皆先次後救公孫敖及諸侯之大夫救徐叔孫豹及諸侯之大夫盟陳袁僑及齊大夫盟于蕲及晉大夫盟于扈是皆事同相比其義自明者也如正月書公在楚其在齊晉則不書公在齊晉正月書公在乾侯其居鄭則不書公在鄭僖公之不雨以月舉文公之不雨以時舉是皆事異相比其義自見者也何謂屬辭辭同相屬辭異相屬上書宋人執鄭

祭仲下書突歸于鄭則知突挈乎仲矣上書戎侵曹下書赤
歸于曹則知赤挈乎戎矣如此之類辭同相屬者也上書會
于垂下書璧假許田則知爲賂鄭矣上書會于平州下書取
濟西田則知爲賂齊矣如此之類辭異相屬者也雖然治春
秋者屬辭之教易明比事之類難通通於其義則可以斷天
下之疑成天下之務故曰治世莫近於春秋

乾隆乙卯五
月二十一日

春秋說略卷一

棲霞郝懿行學

海陽趙銘彝校刊

隱公

元年春王正月

元年君之始年也春周春也王周王也周之正月夏之十一月也表年於魯魯史也繫正於王王周也元年必舉正月謹始也不書公卽位何也不行卽位之禮史故不書○惠公之終不見於經隱公不書卽位其義益不可知傳曰攝也非也攝則不稱公稱公則非攝

三月公及邾儀父盟于蔑

及者與也春秋之法以內及外以大及小不以賤及貴不以外及內儀父邾君之名也時爲附庸故稱名後爲諸侯故稱

爵位牲曰盟。櫛見曰會。○舊說儀父字也。方氏苞謂春秋無書字之法。今從之。

夏五月鄭伯克段于鄆

傳曰段不弟故不稱弟。非也不弟者正當稱弟以見之。陳侯之弟招是也。或曰春秋之初皆不稱弟。史文畧也。非也。齊年鄭語不皆稱弟乎。段不稱弟。蓋非弟也。非弟則何以不書族。春秋之初皆不書族也。克者力勝之。傳曰殺之非也。稱鄭伯君將也。凡君將皆不言帥師。

秋七月天王使宰嚭來歸惠公仲子之賵

仲子者何。或曰惠公妾。或曰惠公母。

據僖公成風之例

不知也。賵者

以車馬助喪紀也。孰爲賵。兼賵也。若非兼賵則不須言惠公也。天王之尊下賄諸侯妾非禮。可知宰官詎名也。宰周公則

書爵宰嚭宰糾則書名不知也公羊以宰爲宰士近是或曰書名孔子貶之非也天王則無貶於其宰焉則貶之何春秋書爵書名各從其實非褒貶所在也

九月及宋人盟于宿

內稱及外稱人皆微者也微者不曰宿微國也凡盟以國地者國主亦與盟○此微者但非君耳或卿或大夫不可知春秋之初外大夫會盟侵伐皆稱人自晉士穀盟垂隴外大夫會盟書名之始也陽處父救江外大夫侵伐書名之始也皆起於文公之世凡稱人稱名史文詳畧隨世以變非義例所在也

冬十有二月祭伯來

祭饒內國伯爵來者內辭也自內出曰如自外至曰來來者

何或曰朝或曰奔皆非也如朝也蕭叔朝公則書之如奔也
周公奔晉則書之如聘也南季來聘又書之此直曰來而已
故知非朝奔聘○方氏苞曰祭畿內邑名伯者王朝卿以行
次書也天子大夫書名卿書行次三公稱公記云五十以伯
仲周道也其稱伯多於叔季者承嗣多嫡長也又曰詩稱召
伯申伯與南仲同春秋書祭伯凡伯與榮叔南季同皆行次
也召公在文王時而稱伯則非爵明矣懿行案此說非也伯
自是爵叔季乃名耳非行次也如鄭伯亦畿內國爲王卿士
而稱伯則伯固是爵也知叔季乃名者何氏休曰天子上士
以名氏通中士以官錄下士畧稱人

見隱元年
公羊注

此則榮叔南

季天子之士以名氏通耳非行次也

公子益師卒

稱公子著親貴也凡書卒者皆卿卿或不卒卒或不日因舊史也或繫而名或名而不繫亦因舊史也史所闕者聖人不能增史所詳者聖人不得畧也以筆削褒貶求之則過矣卿書卒不書葬杜氏預曰葬者臣子事非公家所及

二年春公會戎于潛

夏五月莒人入向

將卑師少稱人得而不居曰入向微國也傳曰我邑非也凡邑無不繫國者經不書伐我非我邑也

案桓十六年城向乃我邑地名偶同耳

無駭帥師入極

無駭者魯卿不氏或未賜族或權位未盛帥師者用衆也極微國也外莒人入向內無駭入極著擅兵之罪○隱桓之世無駭輩挾柔弱皆不氏僖文以後無不氏者矣

秋八月庚辰公及戎盟于唐

春會秋盟傳曰復修戎好也或曰或不曰孔氏穎達曰史有

詳畧耳不可以爲褒貶春秋不以日月爲例

王充論衡正說篇云紀以善惡

爲實不以日月爲意若夫公羊穀梁之傳日月不具輒爲意使夫平常之事有怪異之說徑直之文有曲折之義非孔子

之心○杜預釋例云自文公已上書曰者二百四十九宣公已

下亦俱六公書曰者四百三十二計年數畧同而日數加倍

此則久遠遺落不與近同也

九月紀裂繻來逆女

裂繻者紀卿逆女者卿爲君逆也傳曰逆女必親使大夫非

正也非也天子諸侯與士庶異卿逆而迎於境禮也越國親

迎非禮也文王造舟於渭蓋時爲世子耳

冬十月伯姬歸于紀

女謂嫁曰歸內女歸常事不書書者非常也其得禮而以爲常者則不書蓋孔子削之也此何以書伯姬叔姬後先歸紀書逆文明嫡也

紀子帛莒子盟于密

帛當從公
穀經作伯

程子曰闕文也當爲紀侯某伯莒子盟于密左氏經伯作帛杜預云裂繻字然經無大夫在諸侯上者釋例云魯爲春秋主常列諸侯上非其實次也子帛卿也依魯大夫之比列于莒上故傳曰魯故也非也杜氏旣知魯大夫列諸侯上非其實次魯則有說矣子帛何人何故比于魯大夫列莒子上也十有二月乙卯夫人子氏薨

子氏者隱公妻也或曰桓母或曰隱母非也二母皆妾舉不得稱夫人也成風敬嬴不稱夫人乎春秋之初禮法尙存殆

不其然若隱公爲君妻稱夫人則無嫌也不書葬蓋實未葬也禮有赴葬者有久不葬者皆有故無故而不葬非禮也蔡宣公三月葬周桓王七年葬子氏終隱之世未葬及隱死而遂不葬或雖葬不如禮故史不書耳傳曰不書葬夫人之義從君也非也紀侯尙存伯姬何以書葬莊四年或曰隱志乎讓不以夫人禮葬也非也不以夫人葬何以夫人葬也傳曰不赴於諸侯不反哭於寢不耐於姑故不曰薨今日薨則備禮矣而謂葬不以禮乎葬不以禮薨以禮非情也子氏書薨不書葬實未葬明矣

鄭人伐衛

聲罪致討曰伐春秋書伐二百一十三多無名之師在伐而不戰或衛服故

三年春王二月己巳日有食之

日食之度巧惡者知之而以爲非常者謹天戒也不言朔史失之也○傳曰言日不言朔食晦日也非也食晦則何以不言晦又曰言朔不言日食既朔也非也食既朔亦當有日得其日則何以不言日又曰不言朔不言日夜食也非也卽夜食者至曉而見則既得其朔與日矣何以不言朔與日

三十
六十

三月庚戌天王崩

平王也崩何爲有葬有不葬魯往會則葬不往會則不葬春

秋十二王

不數悼
王敬王

崩葬具者五而已桓襄匡簡景

夏四月辛卯君氏卒

君氏者何傳曰聲子也何以不稱夫人非夫人也非夫人何

以繫之君君之母也君之母故君之非夫人故卒之不言葬
非夫人也經有非夫人而夫人之且葬葬之者矣春秋之末
禮教亡之所由也夫人子氏薨君氏卒禮教存焉爾○顧氏
炎武日知錄曰或疑君氏之名別無所見左傳襄公二十六
年左師見夫人之步馬者問之對曰君夫人氏也蓋當時有
此稱然則去其夫人卽爲君氏矣○案春秋書孟子卒亦此
例李穎曰祭之情事若是隱母必無卒而不葬者昭之與哀
分義疏矣似不得以孟子不葬爲解或如前說禮法尚存
不得成葬祇祔祔然又何以得書卒而聖人曲意徇之乎似宜再參

秋武氏子來求賻

武氏子不名者未官也稱子者繫其父也父在子未官而任
之非禮也不稱使當喪未君也錢財曰賻求賻者王未葬也
不書葬魯不會也不歸賻不臣也王求之不君也歸死者賻

歸生者賄

八月庚辰宋公和卒

諸侯不生名卒名之告終易代也或不名者史失之傳曰同盟則赴以名非也禮赴者惟曰寡君不祿以臣子名先君無是理也諸侯薨正也稱卒者別內外○孫氏覺曰諸侯卽位之初以名赴故卒而得記其名其不名者卽位之初不赴或史失之也傳曰共王之子圍爲長是言嗣君之名矣

冬十有二月齊侯鄭伯盟于石門

春秋書會盟著忠信之衰也內盟言會及外不言者畧之
癸未葬宋穆公

卒自外錄葬自內錄不卒者外不赴不葬者內不會穆者諡也當請於王春秋諸侯皆私諡也稱公者臣子辭惟宋卒葬

皆稱公從其爵也吳楚書卒不書葬避其號也

四年春王二月莒人伐杞取牟婁

書伐書取著暴也陳氏傳良曰外取邑不書自隱以前則書之春秋之初猶以取邑爲重也○李穎曰程子謂莊以前杞稱侯者皆紀之譌王方麓輯畧以爲按之輿地杞不與莒鄰此杞字亦紀之譌其言良是

戊申衛州吁弑其君完

傳曰州吁者嬖妾子寵而好兵莊公卒完立十六年州吁弑而代之不稱公子或云絕其屬籍非也孔氏穎達曰史有詳畧爾釋例云自莊公以上諸弑君者皆不書氏閔公以下皆書氏亦足以明時史之異同非仲尼所皆刊也

夏公及宋公遇于清

杜氏預曰遇者草次之期二國各簡其禮若道路逢遇也方氏苞曰遇者不期而會春秋所書則期而見特不行盟會之禮耳春秋之初書遇者六自閔以後無聞焉

宋公陳侯蔡人衛人伐鄭

宋殤忌馮在鄭州吁立而懼討陳蔡方睦於衛故四國共難鄭或稱爵或稱人爵者君也人者臣也春秋書擄伐於是始秋鞏帥師會宋公陳侯蔡人衛人伐鄭

盟魯鄭也先伐後會者四國已伐鄭而要魯盟復往而會之耳再序四國傳云復伐之也然則單伯會伐宋亦先伐後會而不再序三國何也

據莊十四年

非復伐之也先儒謂再序四國

罪魯黨惡或者又謂大夫與諸侯衆會之始皆非也此二者但書盟帥師會伐鄭亦足以見矣何待再序四國而見也

九月衛人殺州吁于濮

傳云石碯謀也書衛人者從告辭也衛以國討來告故書之不稱君衛人不以爲君也傳曰稱人討賊辭也非也凡討賊殺大夫經皆稱人無異辭非有義例也直書其事耳若以討賊稱人爲予辭則殺大夫稱人豈亦予辭乎賊者人人當討書弑其君賊已見矣不待稱人而見也晉殺里克楚殺蔡般棄疾殺比皆討賊也何不稱人而見乎若謂懷惡而討不予其討尤非也賊者天地所不容有能討者皆當予也因其討不以罪而右之是豈春秋之法乎雍廩殺無知嘗受其虐也蔡人殺陳佗爲立厲公也楚人殺夏徵舒爲欲縣陳也此孰非懷惡而討乎而皆復稱人何也春秋不以人爲褒亦不以人爲貶

冬十有二月衛人立晉

春秋無書立君者此何以書亦從告辭也傳曰衆也非也君非衆之得立也上有天子衆人何得擅立君乎然則舍是無立君者乎有之有則何以不書不告也春秋之初禮法尙存以立君爲重事故以告辭及魯而書其後篡賊公行以立君爲常事不告故亦不書也晉不稱公子何也史文畧也或曰絕之非也○方氏苞曰公子者大夫之稱也故兄弟代立者不稱公子然則楚比棄疾稱公子何也嘗爲大夫也

五年春公矢魚于棠

傳曰矢陳也矢魚則非事于棠則非地○朱子曰矢射也如漢武親射蛟江中之類案淮南時則訓季冬命漁師始漁天子親往射魚疑古者將祭君親射牲故公託矢魚而遠遊與

後說本之
葉氏適

夏四月葬衛桓公

秋衛師入郕

郕國也傳曰衛亂郕侵衛故入之

九月考仲子之宮初獻六羽

考成也宮成爲主而祭焉是別廟也非禮也傳曰庶子爲君
爲其母築宮使公子主祭於子祭於孫止此何禮也凡宮廟
非志災失禮不書六羽者六佾也羽舞羽也佾舞列也佾兼
干羽婦人無武事獨用羽而已初者始也今始六羽明前不
六羽也僭也尊者曰獻蓋萬於仲子之宮也仲子不卒卒在
春秋前觀元年歸貽可見○二傳並云諸公六諸侯四以初
獻六羽爲讓始僭與左傳異

邾人鄭人伐宋

鄭伐宋報伐也邾先鄭主兵也

螟

螟食苗心蟲也爲災故書春秋之初書螟自桓以後書蚤自

閔以後則無螟

此災也洪範五行傳云非常曰異害物曰災

冬十有二月辛巳公子彊卒

宋人伐鄭圍長葛

六年春鄭人來渝平

渝公穀經作輸

渝變也平成也傳曰渝平更成也狐壤之役公與鄭怨鄭人爲此而來變更前惡復修舊好也

夏五月辛酉公會齊侯盟于艾

傳曰始平於齊也凡會盟兼言者先行會禮後結盟不言盟

者徒會也不言會者徒盟也

秋七月

雖無事必書首月備四時也一時不具歲不成

冬宋人取長葛

兵環之曰圍去冬圍之今冬取之長葛不繫鄭者蒙前文

七年春王三月叔姬歸于紀

叔姬者伯姬之媵至是乃歸者待年也媵不書或曰錄賢也

或曰有其終必見其始也

說見莊三十年

滕侯卒

不名史失之不葬魯不會

夏城中丘

傳曰書不時也中丘邑名也凡言城者城之也不時書時亦

書創始書完舊亦書重民力也凡城繫時不繫月不以月成也○傳曰凡城之志皆譏也非也譏不譏視其時與事耳非城卽爲譏

齊侯使其弟年來聘

傳曰結艾之盟也經言兄弟者十傳云母弟稱弟母兄稱兄非也兄弟者以屬稱耳未見爲母弟母兄也且薄於恩者豈以異母貸其罪厚於寵者寧以同母倍其責乎○釋例云諸書弟者皆卿也非也公弟叔胙未嘗爲卿公子季友卒不稱弟杜說爲不通矣方氏苞曰凡書弟者公子而不爲大夫也書公子者大夫也

秋公伐邾

冬天王使凡伯來聘戎伐凡伯于楚丘以歸

傳云凡蔣邢茅胙祭周公之後蓋皆畿內國名也楚丘衛地

或曰非衛地也東襄十年滅偃陽傳云宋公享晉侯於楚丘是宋地別有楚丘與此異也李穎曰斯時戎

在魯西郊頗似狼獾楚丘亦似魯地非衛地又以聘使言伐

莊三十二年城小穀例之楚丘非爲衛城可知者卿行旅從戎以大衆勝之也以歸猶愈乎執也戎伐王使

王不問魯衛不救凡伯不死

八年春宋公衛侯遇于垂

三月鄭伯使宛來歸祊庚寅我入祊

宛鄭卿也鄭有祊惡乎歸魯無祊惡乎入

夏六月己亥蔡侯考父卒

辛亥宿男卒

秋七月庚午宋公齊侯衛侯盟于瓦屋

宋先齊王爵也參盟於是始傳曰遇于垂齊平宋衛於鄭也

盟于瓦屋齊卒平宋衛於鄭也非也一週一盟鄭皆弗與何謂平也程子曰宋爲主盟與鄭絕也恐是

八月葬蔡宣公

三月而葬渴也五月而不葬慢也凡渴葬慢葬皆有故

九月辛卯公及莒人盟于浮來

公親與微者盟目公則知凡不目者非公也浮來者紀邑傳曰以成紀好也或曰好莒也

螟

冬十有二月無駭卒

九年春天王使南季來聘

南氏季名也聘問也古者天子時聘以結諸侯之好諸侯不

朝天王猶聘

三月癸酉大雨震電庚辰大雨雪

震雷也電霆也大兩震電不時也大兩雪不時也皆言大者非常也雨雪不仍至寒燠無竝行

挾卒

傳曰俠者所俠也

公彘二經挾作俠注云所氏俠名也

夏城郎

秋七月

冬公會齊侯于防

十年春王二月公會齊侯鄭伯于中丘

會于防謀伐宋也會于中丘爲師期也

夏鞏帥師會齊人鄭人伐宋六月壬戌公敗宋師于營辛未取郕辛巳取防

內外兵敗或言戰或不言戰文有詳畧耳傳曰皆陳曰戰註戰曰敗非也史自記事耳安能瑣瑣焉記其陳不陳詐不詐也郕防皆邑也邑曰取

秋宋人衛人入鄭宋人蔡人衛人伐戴鄭伯伐取之

冬十月壬午齊人鄭人入郕

以詐盡俘其師曰取入鄭乘虛也入郕報伐戴也鄭宋與國戴鄭與國○春秋兵事之亟無如是年者

十有一年春滕侯薛侯來朝

諸侯非朝天子不旅見穀伯鄧侯別言之不同日也滕侯薛侯並言之同日也諸侯來曰朝大夫來曰聘

夏公會鄭伯于時來

秋七月壬午公及齊侯鄭伯入許

時來鄭地謀伐許也許言入者得而弗居也傳曰會者外爲主及者內爲志非也此一事耳何內外異辭乎許鄰於鄭貪賴土地是本鄭志得而弗居何與魯事而云及者內爲志不亦誣乎

冬十有一月壬辰公薨

傳曰公薨不地故也隱之不忍地也又曰君弑賊不討不書葬罪下也非也隱則不葬桓則葬之何說乎乃爲說曰讐在外不責踰國而討然則不共戴天謂何也方氏苞乃曰弑於臣者賊不討不書葬而弑於世子者賊不討書葬此又非也臣子一例而云弑於臣與弑於子者異則是春秋誅惡有異法也竊疑國亂君弑葬者多不如禮鄰國亦不往會故葬而不書其一二書者必魯嘗往會之因著於冊若以不書葬爲

例此豈春秋之法乎傳載晉弒厲公以車一乘葬之於翼東門之外齊崔杼弒莊公葬諸士孫之里四鬯不踣下車七乘然則葬不如禮與鄰國不會舉可知矣

春秋說略卷一

春秋說畧卷二

棲霞和懿行學

海陽趙銘彝校刊

桓公

元年春王正月公卽位

繼故不卽位不忍也公繼故而卽位忍也以其忍也知其與
聞乎故也卽者就也卽位者告廟踐阼臨羣臣也

三月公會鄭伯于垂鄭伯以璧假許田

夏四月丁未公及鄭伯盟于越

會於垂懼討也璧假田以賂也許田者魯邑訪者鄭邑也始
鄭使宛歸訪欲易焉而不果此曰假何也美其名也曰易則
不歸曰假明有歸焉爾以田易田加璧何也以訪爲薄乎云
爾鄭伯之諉也訪不曰田許曰田何也傳曰田多邑少稱田

邑多田少稱邑盟于越結垂成也魯則無討矣然而魯亦以此無許矣詩曰居常與許復周公之宇豈逮僖公而復得故

田與將假而復歸與

晏子春秋內篇雜上云景公伐魯傳許是許復歸魯之証

秋水

傳曰高下有水曰大水

春秋內大水入

冬十月

二年春王正月戊申宋督弑其君與夷及其大夫孔父

外大夫桓稱人而以事見則名之督父皆名也傳云父字非也及者與也據傳孔父先死其曰及何也春秋之法以貴及賤不以卑及尊也及其大夫何以書傳曰累也孔父正色而立朝則人莫敢過而致難其君者

滕子來朝

滕侯也稱子者蓋時王黜也自是終春秋稱子春秋黜爵者三而已滕薛杞皆微國也○朱子駁胡氏朝桓貶稱子之說是矣然謂列尊貢重故小國降爵以避賦役恐非也或彼白貶而天子因黜之爾

三月公會齊侯陳侯鄭伯于稷以成宋亂

會未有目其故者此曰以成宋亂何嫌也不曰成宋亂卽安知不疑於討宋亂或以他事會乎成者平也其名則美其實則惡春秋書魯事不無少諱焉然亦婉其名而已未始沒其實也宋亂者弑君也何以平立華氏也皆有賂則未知其齊陳鄭者也魯則以郕鼎○胡傳訓成爲定謂成定宋亂直書國惡斯豈春秋婉而成章之體上書成亂下書取鼎大義已明春秋屬辭之教也

夏四月取郕大廟于宋戊申納于大廟

取者非其有也納者強所無也此取之宋其曰郕大鼎何也
傳曰器從名地從主人大廟周公廟也

秋七月杞侯來朝

杞蓋紀字之誤也齊欲并紀紀侯朝魯將求庇焉爾自是三
年會郕六年會成復來朝程子曰凡杞稱侯者皆爲紀

蔡侯鄭伯會于鄧

傳曰始懼楚也公羊以鄧爲國釋例以爲蔡地孔穎達謂鄧
國去蔡甚遠不宜遽會於其國李穎曰蔡去鄧較近於鄧既云懼楚則就鄧與謀宜亦情事所有况穀鄧越千餘里而朝魯蔡顯必以數百里爲遠乎遠年事實固難深考特先備註地理多素其實讀者當察

九月入杞

不稱主帥蓋微者也凡將卑師少外則稱人內則不目

公及戎盟于唐

冬公至自唐

公或至或不至何也出必告行反必告至禮也不至非禮也春秋公行一百七十六至者八十二不至者九十四凡公行告至則書不告則不書釋例曰隱公之不告謙也餘公之不告慢於禮也傳曰凡公行告於宗廟反行飲至舍爵策勳焉禮也特相會往來稱地自參以上則往稱地來稱會

三年春正月

桓元年書王傳曰謹始也二年書王劉敞曰未畢喪也三年以後不書王十年十八年復書王何休曰十年有王數之終也十八年有王桓之終也胡氏曰不書王見桓無王與天王失政也愚謂諸說皆非也桓之篇闕文者三焉非褒貶所在

也秋冬則闕矣大夫卒則闕矣春王正月則王又闕矣謂皆孔子削之何其穿鑿支離而悖於經乎削其王是謂無王削其秋冬是又無天矣無王無天豈春秋乎且夫天王者天下之天王非魯一國之天王也爲一魯國而削天下之天王爲此者必其人深文巧詆如張湯而後可也○春秋闕文其義有二如夏五仲孫忌正月無王之類是皆闕於孔子後者也令闕在孔子前孔子必益之矣諸侯卒不名日食不書朔不書日之類是皆闕於孔子前者也孔子雖知之亦無由而益之矣二端之外可以意求

公會齊侯于贏

傳曰成昏於齊也蓋不由媒介因會結成之

夏齊侯衛侯胥命于蒲

晉命相約信也結言不盟其事近正荀子曰春秋善晉命○

劉氏敞曰晉命非正也彼此相命以成其私蓋相推爲伯也

案劉說恐未必然姑存之

六月公會杞侯于郕

秋七月壬辰朔日有食之既

既盡也

春秋日食既者三

公子翬如齊逆女九月齊侯送姜氏于讙公會齊侯于讙夫人姜氏至自齊

翬稱公子時已貴盛也以其貴盛知其與聞乎故也女在其國稱女入國稱夫人謹魯地也何以不稱夫人自齊侯言之也越境送女非禮也公親迎於境因會齊侯禮也夫人自讙來而曰至自齊亦禮也諸侯不越境而逆親迎於境卽爲身

受其國故本其初所自來而曰自齊也不言輦以至公親受於齊侯也以入國言故曰夫人

冬齊侯使其弟年來聘

傳曰致夫人也杜氏預曰古者女出嫁又使大夫隨加聘問存謙敬序殷勤也在魯而出則曰致女

據成九年季孫行父如宋致女

國而來則總曰聘

有年

年稔也歲穀一熟謂之一年傳曰有年以喜書也大有年亦以喜書也有年者僅有年也大有年者大豐年也然則春秋二百四十餘年書有年者二而已豈餘皆無年乎方氏苞曰承災禋之後則有年必書不承災禋之後則雖有年不書

四年春正月公狩于郎

冬獵曰狩田狩從夏時春狩時也于郕非地也凡蒐狩常事不書非禮則書常地不書非地則書

夏天王使宰渠伯糾來聘

宰亦宰士也渠氏伯糾名也

以伯糾爲名從舉例說見桓十一年祭仲莊二十三年肅叔

宰周公自而不名宰咺名而不氏渠伯糾氏而且名蓋皆因舊史之文雖有詳畧皆紀事實非褒貶所在也左氏云父在故名非也或曰書名孔子貶之亦非也桓宣惡同王季子聘宣何以無貶宣十年天子上士書名不爲貶經無秋冬闕文也或曰貶天王失刑謬也

五年春正月甲戌己丑陳侯鮑卒

甲戌之下己丑之上蓋有關文傳載陳亂佗殺太子免代之公疾病而亂作所闕蓋卽此事也或云再赴或云傳疑皆非

夏齊侯鄭伯如紀

外相朝曰如傳曰齊鄭朝紀欲以襲之紀人知之

天王使仍叔之子來聘

傳曰仍叔之子弱也蓋弱冠之年未任從政不得自以名列於朝故繫其父言之然則與武氏子何以異傳云子者父卒也之子者父在也非也父皆在也傳云父老子代從政也非也如代父任職是有列於朝卽當名其子無爲繫其父矣○方氏苞引左傳韓襄爲公族大夫韓須受命而使是時韓起爲政其子方幼未有職司而奉命以使蓋世卿專權欲任弱子以收威柄而君曲徇之此言近得其實

葬陳桓公

城祝丘

杜氏預曰齊鄭將襲紀故

秋蔡人衛人陳人從王伐鄭

凡首兵稱以此不言王以者不使諸侯敵王也伐鄭討不朝也不朝而親討之不君也王親行而三國之君不從不臣也不言戰王者無戰也不言敗王者無敵也然則茅戎何以敗

非王將也

見成元年

大雩

雩吁嗟求雨之祭爲壇南郊魯之雩門外有舞雩壇也天子曰大雩諸侯曰雩大雩者祭上帝用盛樂雩者祭境內山川而已傳曰龍見而雩龍見者建巳之月春秋無書六月雩者時則不書過則書也何以不書旱言雩則旱見也凡郊禘大雩皆僭也不能備書雩因旱而書郊禘因事而書

冬

螽者蝗也繼零而螽旱蝗也蝗遺種於地旱則復爲蝗水卽

化爲魚

春秋書
螽者十

冬州公如曹

州畿內國名公者天子三公也傳云外相如不書此何以書
過我也非也齊侯鄭伯如紀豈亦過我也

六年春正月寔來

方氏苞謂闕文是也杜預訓寔爲實公穀訓寔爲是謂之是
者簡言之非也書來者當目其人簡其人而沒其名謂之是
而已非辭也程子胡氏訓寔爲名以爲諸侯失地名非也卽
失地者當以名繫國不當以名沒國也傳云淳于公如曹度
其國危自曹來朝遂不復非也不復其國是奔也當書州公

自曹來奔。○法氏坤宏引記云天子曰非佗伯父寔來成二年傳王曰鞏伯寔來以爲寔訓是之證說固可通但孤經難曉當在闕疑

夏四月公會紀侯于成

秋八月壬午大閱

大閱大蒐先儒以爲僭也大閱者大視兵也禮仲冬教大閱秋八月不時也不地者得其地則不書也何休云比年簡徒謂之蒐三年簡車謂之大閱五年大簡車徒謂之大蒐非也蒐閱歲有之何三年五年也凡蒐閱常事不書非時非地非禮則書

蔡人殺陳佗

傳曰陳厲公蔡出也故蔡人殺五父而立之佗踰年之君不

稱君陳人不以爲君也

九月丁卯子同生

同者莊公名也豕姁之生國之大事十二公之記獨此一書何也傳曰疑故志之也非也文姜歸魯且四年中閒又未如齊安得疑同爲齊侯之子乎然則何也書者豕姁不書者非豕姁或生者在其父未君之前卽是豕姁亦不書也不稱世子何也未誓也天下無生而貴者也

冬紀侯來朝

七年春二月己亥焚咸丘

焚火田也譏盡物咸丘非地也譏淫獵

夏穀伯綏來朝鄧侯吾離來朝

時齊之君來朝稱名介葛盧卿率來是也不知其名則人之

邾人牟人葛人是也其有爵者則稱爵穀伯綏鄧侯吾離是也既有爵矣豈復附庸乎春秋時有之也鄆子子也而魯請屬之滕侯侯也而宋請屬之屬之是附庸於宋魯也穀鄧近楚蓋是楚之附庸魯人遠而輕之故舊史名之與李穎曰新矣夷諸侯於九縣何復附庸之有或謂魯有望國之名穀鄧始懼楚而欲求遠援如後江黃會黃之類以前蔡鄭會鄧參之似合情事竊疑遠夷不嫺禮文自以其傳曰失地之君故名相通魯史因而書之春秋因而不革爾傳曰失地之君故名之非也卽失地者當言來奔不當言來朝或曰貶稱名非也滕子紀侯來朝何以不名兩言來朝非旅見也不具秋冬史闕文也

八年春正月己卯烝

祭用夏時烝以仲冬正月而烝時也其書以再烝也

天王使冢父來聘

家氏父名也

夏五月丁丑烝

五月不時也烝又烝驪也凡常祀非失禮不書

秋伐邾

不言將帥義與入杞同

冬十月雨雪

不時也春秋書雨雪三他皆言大此不言大言大者以大書不言大者以失時書

祭公來遂逆王后于紀

祭公天子三公也來者先儒以爲問昏期非也書曰來而已安知爲問期來也不稱王使私行也本以私事來遂以逆后往非禮也何以不稱逆女王后尊也王命之后則后矣○內

女內夫人王后昏姻常事得禮不書非禮然後書

九年春紀季姜歸于京師

逆曰王后歸曰季姜何也自逆者言則曰王后自歸者言則曰季姜逆稱季姜則不知爲王后也歸稱王后又不知爲季姜也京師者大衆也王所居故衆大之

夏四月

秋七月

冬曹伯使其世子射姑來朝

杜氏預曰曹伯有疾使世子射姑來朝世子而君之非禮也魯而君人之世子亦非禮也周禮諸侯嫡子誓于天子而攝其君則下其君禮一等謂朝天子也攝而朝諸侯則非也

十年春王正月庚申曹伯終生卒

夏五月葬曹桓公

秋公會衛侯于桃丘弗遇

衛侯與公爲會期中背公更與齊鄭故公獨往而不遇衛失信也

冬十有二月丙午齊侯衛侯鄭伯來戰于郎

三國來爲戰也不言敗未敗也其來戰何爭周班也傳曰伐戎之役魯以周班後鄭先齊衛周班也○或曰齊主兵爲紀故

十有一年春正月齊人衛人鄭人盟于惡曹

人者人大夫也三國之君既釋兵而使大夫更結盟胡氏以稱人爲貶非也春秋不以人爲貶

夏五月癸未鄭伯寤生卒

秋七月葬鄭莊公

九月宋人執鄭祭仲突歸于鄭鄭忽出奔衛

凡諸侯相執或稱爵或稱人大夫皆稱人以執之賤也祭仲

者鄭仲其名也

釋例云伯仲叔季固人字之常然古今亦有以爲名者宰父伯糾蕭叔大心皆以伯叔爲

名則仲亦名也傳又云祭仲足或歸者順辭也有易辭焉入

偏稱仲或偏稱足蓋名仲字足也者逆辭也有難辭焉突之歸也易也挈乎祭仲也鄭忽者鄭

君也不稱爵未踰年也未踰年何以不稱子子者在喪之稱

也出則不終喪亦不稱子也忽正也突不正也繫鄭不繫鄭

者便文爾

柔會宋公陳侯蔡叔盟于折

傳曰爲宋謀鄭也方氏苞曰柔魯卿也蔡叔蔡侯之弟也諸

侯兄弟將承國者則以行大書所以示兄終弟及之義而別

於公子爲卿大夫者杞季蔡季許叔之類皆是也其不稱蔡侯之弟何也凡書某氏之子某君之弟皆無位之稱也愚謂蔡叔紀季蔡季許叔之類皆名耳非行次也

公會宋公于夫鍾

冬十有二月公會宋公于闕

十有二年春正月

夏六月壬寅公會杞侯莒子盟于曲池

杞亦當爲紀傳曰平杞莒蓋非也疑與莒尋浮來之盟同謀紀故也

秋七月丁亥公會宋公燕人盟于穀丘

燕南燕會燕人者亦爲宋故也

八月壬辰陳侯躍卒

公會宋公子虛

冬十有一月公會宋公子龜

二年之間兩盟四會皆爲宋謀鄭也卒與鄭伐宋前盟口血未乾也○汪氏克寬曰宋會魯者將求賂於鄭魯會宋者將爲鄭免賂是以卒不能降心相從也

丙戌公會鄭伯盟于武父

鄭伯者突也不正矣君之何也蘇氏轍曰諸侯雖以寡得苟內外君之則君之不沒其實也雖君而實寡雖寡而實君皆因其實而已

丙戌衛侯晉卒

牟廷相曰再書丙戌傳云決日或云義文皆非也二事不相屬不再書丙戌則是衛侯之卒爲無其日也豈傳信乎

十有二月及鄭師伐宋丁未戰于宋

孰及之公也不言公蒙前文也閒有異事何以蒙之衛侯晉卒與盟武父同日故亦爲閒無異事也凡一事而再見者畧之○內不稱公外不稱鄭伯抑或皆微者也二君親盟不親伐豈皆遣師以行與

十有三年春二月公會紀侯鄭伯己巳及齊侯宋公衛侯燕人戰齊師宋師衛師燕師敗績

不地者蓋戰于宋也亦蒙前文也歲且改矣何以蒙之閒無異事也何以知地於宋也前年及鄭師伐宋戰于宋故不復舉地也一事而再見者畧之此亦是也宋旣戰而請救於齊齊約衛燕以援宋紀者齊仇也故魯鄭援紀以抗齊紀先鄭王爵也齊先宋主兵也趙氏匡從穀梁云不地於紀也非也

地於紀當魯戰于紀也方氏苞從公羊云不地近也近於圍
非也地於魯當書四國來伐也方氏云史諱伐非也外兵來
伐非國惡何故諱之定哀多微辭猶不諱伐春秋之初何故
反諱也戰稱君敗稱師傳云重衆也衛宣未葬衛朔何以稱
侯凡諸侯在喪而有外事以喪行者子以吉行者爵皆非禮
也有甚不甚焉

三月葬衛宣公

旣與戰矣復會其葬君子曰怨不棄義怒不廢禮惡不忘親

夏大水

秋七月

冬十月

十有四年春正月公會鄭伯于曹

無冰

恒燠也凡不宜無日無不宜有日有有無不爲災不書○方

氏苞曰正月無冰寒遲也丑月尙有冰也二月無冰燠早也

成元

子月己有冰也春無冰通一時而常燠也襄二十八年尤災

異之大者

春秋書無冰者三

夏五鄭伯使其弟語來盟

夏五闕文也來盟或稱使或不稱使稱使者前定也不稱使者非前定也

秋八月壬申御廩災乙亥嘗

御廩粢盛之所藏也天火曰災八月嘗不時也不改卜不敬也傳曰未易災之餘而嘗也非也壬申乙亥越四日粢盛出廩久矣傳曰米而藏之御廩非也御廩藏粟不藏米春人職

祭祀共衆盛之米詩曰誕我祀如何或春或採新御廩不書常事也得禮故不書

冬十有二月丁巳齊侯祿父卒

宋人以齊人蔡人衛人陳人伐鄭

傳曰報宋之戰也凡師能左右之曰以方氏苞曰霸國會討列國運兵皆列序必以弱假強而後書以

十有五年春二月天王使冢父來求車

求購求車求金何以書天王求諸侯貪大夫鄙士庶盜竊

三月乙未天王崩

夏四月己巳葬齊僖公

五月鄭伯突出奔蔡鄭世子忽復歸于鄭

奔者必有逐也春秋書奔不書逐君臣皆以自奔爲文逐突

者祭仲也突名者失國也失國或名或不名從告辭也忽奔不稱子歸稱世子何也奔不稱子失位也歸稱世子正名也亦從告辭也其不稱鄭伯何也當喪而出未成君也出未成君故歸不稱魯突曰歸易辭也忽曰復歸反正也國固忽之國也古者諸侯世國大夫不世官世者得復未絕也不世者不得復絕也

許叔入于許

許叔者許君之弟書曰入難也許自鄭入後十五年不見經今鄭亂許叔因而入之也入之則君矣故其後許復見經先儒以爲無王命不正其入也非也此當與其能興復不當病其無王命春秋諸侯怙彊滅人國人復之何謂不正乎今有大盜劫人財人亦開盜而取之官釋盜勿問而詰取者曰何

故擅取爾財也非春秋之法也

公會齊侯于艾

傳曰謀定許或曰非也魯與齊絕至是復通好

邾人牟人莒人來朝

諸侯來曰朝此三國之君也皆何以稱人附庸之君名之
不名者史失其名也邾儀父嘗名矣此人之者一之也凡稱人
稱名或便文無義例也天王崩不奔喪而相朝又旅見非禮
可知○杜氏預曰三人皆附庸之世子降稱人非也附庸雖
君恒稱人

秋九月鄭伯突入于櫟

稱鄭伯已君也書曰入逆辭也傳曰莊公城櫟而寘子元焉
使昭公不立然則何以不曰入於鄭猶未入鄭也雖未入鄭

入櫟則入鄭易矣。耦國也。○方氏苞曰：突入櫟，稱鄭伯以後。此會盟征伐交政於諸侯者，皆突也不於其入稱爵，則疑於忽。魯儀矣。忽，魯儀之弑，不書何也？或曰：不告，故不書。

冬十有一月公會宋公衛侯陳侯于袤伐鄭

謀納突也。或曰：伐突非也。伐鄭非伐櫟也。地而後伐，先會後伐也。傳曰：疑辭非也。

十有六年春正月公會宋公蔡侯衛侯于曹

夏四月公會宋公衛侯陳侯蔡侯伐鄭

納突也。春會曹蔡先衛夏伐鄭衛先蔡杜氏預曰：蓋後至也。以至之先後，易王得春秋因而不革，著實也。

秋七月公至自伐鄭

冬城向

十有一月衛侯朔出奔齊

朔殺兄篡國其出奔也左氏云逐公穀云得罪天子方氏苞曰諸侯出奔而名者國有二君也

十有七年春正月丙辰公會齊侯紀侯盟于黃

傳曰平齊紀且謀衛故也

二月丙午公會邾儀父盟于雒

夏五月丙午及齊師戰于奚

傳曰疆事也孰及之微者也不書敗微之也或勝負敵

六月丁丑蔡侯封人卒

秋八月蔡季自陳歸于蔡

蔡季者蔡侯之弟獻舞也其歸蓋蔡人召而立之也

癸巳葬蔡桓侯

何以稱侯趙氏汭曰文誤也。○或曰稱侯正也稱公非正也
啖氏助曰其稱侯蓋蔡季之賢請諡於王也恐非

及宋人衛人伐邾

孰及之微者也趙盟未寒而背之傳曰宋志也

冬十月朔日有食之

朔不日史闕也陳氏傳良曰日食自文以上有不日自文以
下無不日故曰桓莊多闕文

十有八年春王正月公會齊侯于濞公與夫人姜氏遂如齊

公將往而會夫人與公偕會無夫人夫人不與會也何以不
曰公及夫人及者順辭也與者等辭也夫人伉非公所及也
夏四月丙子公薨于齊丁酉公之喪至自齊

公薨於內不地故也於外非故亦地也薨而地葬而書何以

別於非故者也別有見也

莊元年不書公卽位下書夫人孫于齊其爲故可知

秋七月

冬十有二月己丑葬我君桓公

春秋說略卷二

春秋說略

卷二 桓公

夫

春秋說畧卷三

樓霞郝懿行學

海陽趙銘彝校刊

莊公

元年春王正月

三月夫人孫于齊

不稱姜氏前已見也故畧之畧之所以諱之也姜氏與聞乎弑義絕矣何故諱之非諱姜氏爲國惡故爾先君弑夫人奔于齊痛夫國之不國也故爲前沒其文後顯其義讀夫人孫于齊而不言夫人誰氏也讀夫人姜氏會齊侯而後知夫人姜氏也君子諱國惡其義當然也內諱奔曰孫夫人有歸矣不書歸亦諱之也書夫人姜氏會齊侯則歸也可知矣傳曰不稱姜氏絕不爲親非也絕不爲親當去其夫人而曰姜氏

奔於齊何故反稱夫人孫也以是知爲諱之也

夏單伯送王姬

送當從公穀經作逆

單伯亦名也

據祭仲蕭叔伯糾皆名之類

王姬者齊襄之儷也不稱伯仲

以王爲尊也王嫁女魯逆者爲之主也不言於京師省文也

既稱王姬不言京師亦從可知傳曰義不可受於京師也非

也既無當受亦無當逆何故偏諱也○二傳經文作逆王姬

故以單伯爲魯臣左氏經文作送王姬故以單伯爲王卿士

一字之異解遂不同以文十五年經書單伯至自齊推之則

知單伯實魯臣矣若王臣當書單伯歸於京師不當言至也

又案十四年單伯會齊侯宋公衛侯鄭伯于鄆若王臣當書

單伯齊侯某某會于鄆不當屬會於單伯也會伐宋亦然

案

莊初逮文未八十餘年而單伯尚能爲使如齊則其人當百有餘歲矣或疑單伯非一人蓋族人有同名者亦未可知以

爲命鄭書
字者非

秋築王姬之館于外

築爲治館也外城外也魯先主昏當有舊館廢而不用示變
常也接仇讐於昏媾交衰麻於弁冕築館於外之爲宜不如
辭而勿主之爲得也

冬十月乙亥陳侯林卒

王使榮叔來錫桓公命

春秋或稱王或稱天王或稱天子一爾猶之稱天或稱帝或
稱上帝或稱上天今日王不稱天文乃是貶然則稱天王者
文乃是褒乎豈亦可云稱上帝者文乃是褒稱帝者文乃是
貶乎人而無敢褒貶天亦明矣褒貶天是謂無天褒貶王豈
不謂之無王乎已則無王而又以責人何以爲春秋錫命者

賜之命也或喪之辭或加之服不知也

王姬歸于齊

齊師遷紀邾鄆邾

邾鄆邾者紀邑也齊欲滅紀彊遷其人因取其地邑不言遷
遷不言師言遷言師著暴也凡自遷者曰某遷於某彊遷者
曰某人遷某以師遷甚矣

二年春王二月葬陳莊公

夏公子慶父帥師伐於餘丘

慶父者公庶兄也或曰弟也於餘丘者國也傳曰邾婁邑非
也邑不言伐伐邑無不繫國者此非魯仇也將尊師衆汲汲
伐之謂之偵也

秋七月齊王姬卒

王姬歸與卒書之何也爲之主則書歸爲之服則書卒不歸者魯不主也不卒者魯不服也不服者不告也檀弓記曰齊毀王姬之喪魯莊公爲之大功

冬十有二月夫人姜氏會齊侯于禚

傳曰書姦也趙氏匡曰姜氏齊侯之惡著矣亦所以病公也乙酉宋公馮卒

三年春王正月溺會齊師伐衛

孫氏復曰衛朔在齊溺會師伐衛謀納朔也懿行案傳云疾之蓋疾其會仇讐黨有罪逆王命也而杜預謂疾溺專命故去氏非矣不氏者非貶去其氏

夏四月葬宋莊公

五月葬桓王

七年乃葬緩也傳云改葬非也魯會葬不書其人蓋微者也抑或史有詳畧

秋紀季以鄆入于齊

鄆者紀邑也紀侯恥臣齊判國以屬弟爲齊附庸請後五廟季者名也入而不叛有君命也書曰入難也

冬公次于滑

次者止也傳曰欲救紀而不能也方氏苞曰或云紀在魯東北滑在西南救紀之師不宜次此滑衛南鄆豈奉齊命以俟諸侯納朔而不至與

四年春王二月夫人姜氏享齊侯于祝丘

杜氏預曰享食也兩君相見之禮愚謂享接於廟夫人淫邪特假其名耳非必卽用其禮傳曰享甚矣

三月紀伯姬卒

夏齊侯陳侯鄭伯遇于垂

三國遇垂其事未聞或曰紀故也鄭伯者突也突未入鄭何知鄭伯爲突突能君也或曰子儀也非也忽臺儀之爲君蓋微矣不見於春秋知突爲鄭伯也

紀侯大去其國

紀侯失國何以不名非作也不言滅鄒存焉爾不言奔智存焉爾不爭地以殘人不見逐以羞已故特書曰大去其國不書所去不知所終也○或曰紀侯名大

六月乙丑齊侯葬紀伯姬

內女不具卒卒紀伯姬爲葬故也亡國之君不葬葬紀伯姬爲齊故也齊則何爲爲之葬爲諉也伯姬在殯紀侯去國葬

之將以揜滅國之名耳葬者臣子事也齊侯豈人臣子乎而葬也名亦不可揜也伯姬無諡紀侯存也凡婦人無諡從夫之諡釋例云不書諡者蓋亡國之婦夫妻皆降莫爲之諡也

秋七月

冬公及齊人狩于祊

齊人微者也傳云齊侯非也卽齊侯者何故人之云諱與讐狩也非也方將讐之何故諱之且讐讐狩者謂與齊侯狩也讐與齊人狩也亦讐今日實齊侯稱齊人則是與齊侯不可狩與齊人卽可狩親與讐狩卽可讐親與讐之人狩卽不可讐是豈春秋之法乎或曰狩非微者事也以是知之非也經書西狩于大野則非公狩也明矣○春秋傳信之書諸所稱名罔非實錄名實混淆豈傳信也春秋全經亦無以侯稱人

之例

五年春王正月

夏夫人姜氏如齊師

孔氏穎達曰於時齊無征伐之事不知師在何處蓋齊侯疆理紀地有師在紀不言會者不行會禮

秋鄭犁來來朝

鄭國也犁來名也時爲附庸故稱名後爲小邾故稱爵

冬公會齊人宋人陳人蔡人伐衛

納朔也不言納省文也下書朔入衛其爲納朔可知矣四國稱人微者也傳曰人諸侯也人諸侯所以人公也非也公則稱公人則稱人著其實也春秋不以人爲貶

六年春王正月王人子突救衛

王人下士也子突其名也王人出會諸侯皆不名此名者在會諸侯皆稱爵無爲王人獨名也此獨王人所有事無爲不著其名也或名或不名便文耳非謂貶其可貶褒其可褒也救衛拒納朔也正也救者正則伐者不正矣

夏六月衛侯朔入于衛

入者逆辭也王救衛朔入衛逆王命可知

秋公至自伐衛

惡事不致其以伐衛致何也公不以爲惡而成之史因其爲惡而書之

螟

冬齊人來歸衛俘

俘者軍所獲也歸俘者猶獻捷也伐衛齊爲首故歸之○公

穀經旨爲寶左氏傳亦爲寶而經爲俘杜預疑經文誤恐非也書序遂伐三股俘厥寶玉衛之俘或卽是寶亦未可知但公穀之意以寶爲賂衛人歸齊齊歸魯與左氏異耳七年春夫人姜氏會齊侯于防

夏四月辛卯夜恒星不見夜中星隕如雨

恒星經星也不見夜明也如雨言多也隕霜先言隕星隕先言星者見其隕而知爲霜故先言隕先見星而後見隕故先言星隕者衆星也於衆星見其隕卽恒星復見可知

秋大水無麥苗

無者僅無也大無者盡無也據二十八年書大無麥禾此何以僅無災於

水也彼何以盡無災於人也先麥後苗何也麥先熟而敗苗將秀而漂

冬夫人姜氏會齊侯于穀

八年春王正月師次干郎以俟陳人蔡人

俟陳蔡其事未聞范氏甯謂陳蔡將伐我非也杜氏預謂期共伐郕也

甲午治兵

治兵者習戰也不地者於郕也師久次郕所俟不至卒伍潰散故申明約束訓齊其衆也○傳曰治兵於廟禮也非也廟嚴者也治兵非其地鄭伯伐許授兵大宮楚子伐隨將齋杜預云將授兵於廟是當時治兵皆以於廟爲禮矣非也

夏師及齊師圍郕郕降于齊師

秋師還

未有言師還者此其言之何親仇讐圍同姓勦民力踰三時

而後還故特文以見義凡君將不稱師重君也春次郎夏圖
邨秋還皆稱師師衆也不稱公非公也○胡氏據左氏謂公
實親將經不書公所以見貶非也見貶者當書公以見之
冬十有一月癸未齊無知弑其君諸兒

九年春齊人殺無知

傳曰雍廩殺也書齊人者從告辭也齊以國討來告故書之
不稱君齊人不以爲君也

公及齊大夫盟于蔑

將納糾也齊人皆來受盟盟者衆不可但稱齊人不可徧舉
其名故統曰齊大夫

夏公伐齊納子糾齊小白入于齊

稱子者宜爲君也凡嗣子在喪稱子子糾不繫齊者蒙伐齊

文也小白繫齊者不繫齊則不知爲何人也公納糾未至小白自莒先入書曰入逆辭也又難辭也○張氏照曰羣公子稱公子世子嗣位未成君稱子春秋書子糾不曰公子糾貴可知矣糾小白孰爲兄弟不必論

案左氏經糾上有子字程子據公穀辨其誤非也

秋七月丁酉葬齊襄公

八月庚申及齊師戰于乾時我師敗績

戰不稱公非公也公親伐不親戰故伐則稱公戰不稱公杜氏預曰諱也非也戰而敗績雖殘民非大惡也公如齊納幣書觀社書皆大惡也而無諱獨諱師敗績何也傳曰內不言戰言戰乃敗也非也此言戰又言敗凡言戰不言敗者敗輕也言戰又言敗者敗甚也輕者畧之甚者書之非有諱也諱則沒其實矣

九月齊人取子糾殺之

取易辭也有逆辭焉齊不當取魯不當與殺之甚矣稱齊人人大夫也傳曰鮑叔帥師來言也又曰魯人殺之非也

冬浚洙

洙水名浚深也以備齊

十年春王正月公敗齊師于長勺

傳稱齊師伐魯經不書伐胡氏因謂意在責魯非也內敗外兵不書伐者多矣文有省畧非譏貶也傳云皆陳曰戰詐戰曰敗凡書敗者譏之非也譏不譏視其事耳非書敗卽譏也

二月公侵宋

或言伐或言侵何也聲罪曰伐掠境曰侵

三月宋人遷宿

何以不地亡也凡遷而地者後復見遷而不地者後不復見
○傳曰遷者猶未失其國家以往者也許氏翰曰猶未失其
國家以往其義猶有所難則是王澤之未竭也僖文以後有滅
國無遷國矣

夏六月齊師宋師次于郎公敗宋師于乘丘

檀弓記曰魯莊公及宋人戰於乘丘縣賁父御卜國爲右馬
驚敗績今經書公敗宋師知記文誤也

秋九月荆敗蔡師于莘以蔡侯獻舞歸

荆楚一國二名荆無人何也未與夏通史畧之也

冬十月齊師滅譚譚子奔莒

書滅國自此始齊桓爲之也凡國亡君死曰滅國滅君亡曰
奔蔡侯何以名譚子何以不名凡諸侯卒名之告終也奔失

地名之亦告終也名者正也其不名者史失之也舊說以歸者皆名奔者皆不名非也以歸皆名喪子何以不名奔者不名徐子章禹何以名

十有一年春王正月

夏五月戊寅公敗宋師于鄆

秋宋大水

外災也何以書告則書弔則書

冬王姬歸于齊

王姬歸不具書莊公之篇再書之魯主昏也魯主昏於齊也十有二年春王三月紀叔姬歸于鄒

紀侯去國叔姬從至是紀侯卒始歸鄒國亡矣猶不忘故主之宗廟爾明婦人夫死歸宗非其正道著叔姬之節爲千古

風也

夏四月

秋八月甲午朱萬弑其君捷及其大夫仇牧

冬十月朱萬出奔陳

仇牧何以書不避難也萬奔陳何以書罪陳也凡賊所奔其國有罪傳云宋人求萬醢之賊討矣閔公何以不葬蓋魯不會也謂賊不討不書葬蔡般許止見存蔡景許悼何以葬謂賊既討書葬里克甯喜既誅晉卓衛剽何以不葬或曰當葬賊已討則書葬既葬賊雖討不書亦非也○宋人殺萬不書於經或傳所載非其實抑或宋不告也

十有三年春齊侯宋人陳人蔡人邾人會于北杏

傳曰平宋亂也齊稱侯君也四國稱人大夫也君何爲親與

大夫會春秋君與大夫會盟者多矣或曰獨書齊侯始霸之辭非也始霸之辭不待書齊侯而見也○齊侯數梁經作齊人傳云齊侯稱人始疑之非也

夏六月齊人滅遂

不書奔者國滅君死之正也滅愈乎奔奔愈乎以歸以歸愈乎執○春秋大陵小衆暴寡致滅亡者非小國之罪書之者閔弱小惡强大病天王也

秋七月

冬公會齊侯盟于柯

傳曰始及齊平也譬易世矣齊桓又倡大義尊周室雖與盟可也傳曰敵惠敵怨不在後嗣○公羊稱曹沫劫盟乃戰國刺客之流未可信也

春秋左傳卷三十一
十
十有四年春齊人陳人曹人伐宋

夏單伯會伐宋

傳曰宋背北杏之會故伐之其稱人將卑師少也公使單伯會之先伐後會者不及伐也

秋七月荆入蔡

冬單伯會齊侯宋公衛侯鄭伯于鄆

十有五年春齊侯宋公陳侯衛侯鄭伯會于鄆

傳曰會於鄆宋服故也復會焉齊始霸也

夏夫人姜氏如齊

秋宋人齊人邾人伐鄆

鄆宋附庸也因其叛伐之宋先齊主兵也伐鄆伐徐亦同

鄭人侵宋

冬十月

十有六年春王正月

夏宋人齊人衛人伐鄭

秋荊伐鄭

南北爭鄭於是始

冬十有二月會齊侯宋公陳侯衛侯鄭伯許男滑伯滕子同盟于幽

傳曰鄭成也會不目公蓋微者也或闕文傳曰沒公非也許男先滑伯始亂王爵也同盟者志同欲也盟有同有不同史有詳畧耳杜氏預曰書同盟者服異也不書同盟者非服異也○公羊經會有公許男下公穀有曹伯

邾子克卒

邾稱子者蓋齊桓尊周請於王而進其爵○方氏苞曰先儒據此以儀父爲字克爲名不知小國諸侯卒不見於魯史者多矣克與儀父非一人儀父卒不書至克始書耳

十有七年春齊人執鄭詹

杜氏預曰諸執大夫皆稱人以執之大夫賤也執之者何傳曰鄭不朝也然而齊亦不朝也

夏齊人殲于遂

殲盡也傳曰齊滅遂而成之遂之餘民醉而殺之齊人殲焉何以不言遂人殺齊戍遂亡矣無人也然則何以言齊人殲于遂遂猶有人也何以書從告也惡在齊義在遂

秋鄭詹自齊逃來

逃賊者事也詹不能伏節守死也

冬多麋

十有八年春王三月日有食之

不言日與朔史失之也傳曰夜食非也○張氏瑗三傳折諸
曰春秋日食三十六有甲乙者三十四歷家推驗精者不過
得二十六唐一行得二十七周王朴得二十五莊十八年三
月日食古今算不入法有淮南衛朴者精歷術春秋日食獨
得三十五惟此算不入與諸家同

夏公追戎于濟西

不言來何也文畧也言追則必有來矣或曰魯無備也戎侵
魯魯不知於其去也追躡之濟西魯濟也

秋有鼓

鼓短狐射人者也麋所有也多爲災鼓所無也有爲災

冬十月

十有九年春王正月

夏四月

秋公子結媵陳人之婦于鄆遂及齊侯宋公盟

媵，淺事也。何以書以遂事書也。陳人，陳大夫也。鄆，衛地也。程子曰：鄆之巨室嫁女於陳人，結以其庶女媵之。孔穎達曰：凡爲媵者皆送至嫁女之國從嬭而行。今日于鄆，故知鄆女爲陳人婦者也。結至鄆，聞齊宋爲會，遂與之盟。大夫無遂事，大夫特盟，公侯非禮也。○公穀皆謂魯女媵陳侯之婦，非也。陳侯君也，何爲稱人？陳之夫人何爲稱婦？卽如此，當書公子結歸媵于陳足矣，何須辭費。

夫人姜氏如莒

杜氏預曰非父母國而往書姦

冬齊人宋人陳人伐我西鄙

外兵加魯皆曰鄙遠之也傳曰不以難通我國也三國來伐或曰爲鄭詹也或曰爲結之仇盟也非也卽爲仇盟無與盟可矣

二十年春王二月夫人姜氏如莒

夏齊大災

天火曰災大者已甚也

秋七月

冬齊人伐我

戎穀
經作
侯

二十有一年春王正月

夏五月辛酉鄭伯突卒

春秋左傳卷三十一
秋七月戊戌夫人姜氏薨

冬十有二月葬鄭厲公

厲之諡惡也是雖私諡不廢公議

二十有二年春王正月肆大眚

肆赦也眚罪也肆大眚惠姦宄賊善良

癸丑葬我小君文姜

婦人無諡從夫之諡別立諡非禮也自此始

陳人殺其公子御寇

言公子不言大夫非大夫也傳曰殺其太子非也如實太子者當書殺其世子何稱公子也方氏苞曰國亂衆人擅殺及兩下相殺皆不得不書人非也經凡書某人殺其大夫公子皆君殺之辭也不曰君者大夫賤猶之執大夫皆稱人以執

也衆人擅殺而無主名當書盜兩下相殺當書名何得書人
也又謂兩下相殺不書尤非也國亂無政至於同列相賊安
得不書也殺大夫公子或稱國或稱人何也文有詳畧耳非
義例也

說又見文
九年三月

夏五月

五月何以首時蓋闕誤也。何氏休曰譏莊公取魯女不可
事先祖猶五月不宜首時又以昭十年十二月無冬爲昭公
取吳孟孺之年故貶之皆非也果如其說二百四十二年之
春夏秋冬可存者廟矣

秋七月丙申及齊高侯盟于防

孰及之杜預云微者也何以知非公也以納幣不諱公知之
也高侯者齊卿也公與齊昏故來結盟

冬公如齊納幣

納幣者納徵也宜使大夫公親之非禮也何以不沒公公之大惡有三焉春秋不能爲諱也取譬女無父喪圖昏無母親納幣無君

二十有三年春公至自齊

公出不皆致獨納幣觀社逆女三事致告廟也皆如齊也

六年伐
式亦致

祭叔來聘

不稱使非王命也非王命而聘假聘禮以行也祭伯來不言事祭叔聘不稱使皆私交也私交非禮也

夏公如齊觀社

齊因祭社蒐軍實故公往觀之非禮也傳曰尸女也

公至自齊

荆人來聘

楚交諸侯自此始其稱人傳云進之非也便文耳

公及齊侯遇于穀

蕭叔朝公

蕭蓋宋附庸國叔其君名也

案傳有蕭叔大心釋例云伯仲未審卽是人

叔季固人字之常然古今亦有以爲名者此說是也朝不言來於外也穀者齊地也公與齊侯遇蕭叔朝於此非禮也凡朝聘壹受於廟歸美先君且以敬賓

秋丹桓宮楹

冬十有一月曹伯射姑卒

十有二月甲寅公會齊侯盟于扈

遇于穀盟于扈亦尸女也

二十有四年春王三月刻桓宮楨

丹楹刻桷非禮也丹塗也楹柱也刻鏤也桷椽也將取齊女預爲盛飾夸示之不言新宮非新也

葬曹莊公

夏公如齊逆女

秋公至自齊八月丁丑夫人姜氏入

逆女使卿越國親迎非禮也親迎與夫人偕至先至非禮也八月丁丑日具者避同至也入者逆辭也何以不言夫人姜氏至自齊至者廟見也不至者亦廟見也以其不同至故以逆辭書也何以知必廟見也丹桓宮楹矣刻桓宮桷矣

戊寅大夫宗婦覲用幣

覲見也宗婦同姓大夫妻也言宗婦必言大夫者明俱覲也
禮夫人至大夫見於廟婦見於內別也同覲不別也男女異
費別也用幣不別也君子曰處父來矣

大水

冬戎侵曹曹羈出奔陳赤歸于曹

鄭忽曹羈一也突赤亦一也突之歸也宋也赤之歸也戎也
彼先歸後奔此先奔後歸何也歸在先者彊甚也奔在先者
弱甚也羈不稱爵不能君也或曰從告辭也不稱子當喪而
出不能子也或曰亦從告辭也

郭公

闕誤也

二十有五年春陳侯使女叔來聘

女氏叔名也諸侯交聘於是始

夏五月癸丑衛侯朔卒

不葬魯不會也或曰朔犯王命去葬以討非也

六月辛未朔日有食之鼓用牲于社

吳氏澂曰社者祭地示也其祭有常禮不書經所書社凡四
非爲社書也

伯姬歸于杞

不言逆逆者非卿畧之。方氏苞曰伯姬桓公女也左氏以
爲莊公女非也時君之女當書子伯姬

秋大水鼓用牲于社于門

天災無牲水災無鼓日有食之用幣是也用牲非也不鼓於
朝而鼓於社社不受也大水用牲是也鼓非也不祭於壇而

於社於門社門不受也應天以賢不以文文又失也門國門也

冬公子友如陳

報女叔之聘也凡內朝聘皆書如

二十有六年春公伐戎

夏公至自伐戎

曹殺其大夫

不名史闕也傳曰衆也非也晉三郤亦衆也何故名之杜氏預曰無罪也非也殺大夫多矣曹宋不名其餘皆名豈盡有罪也殺者或稱國或稱人何也詳畧辭也或曰稱國以殺者君殺之罪累上也稱人以殺者衆殺之殺有罪也非也大夫雖有罪諸侯專殺之惡也有專命而後有專殺諸侯皆專命

故亦專殺也或曰春秋不書天王殺大夫予其專殺也非也東周以來天子守府實不能殺大夫耳如實殺者就令義得專殺法固當書也以其不書知其實未嘗殺也惟見於傳者間有一二而亦不書抑或不告與

秋公會宋人齊人伐徐

二國稱人將卑師少也宋先齊主兵也

冬十有二月癸亥朔日有食之

二十有七年春公會杞伯姬于洮

婦人會非事也參議之

夏六月公會齊侯宋公陳侯鄭伯同盟于幽

傳曰陳鄭服也又曰同者有同也同尊周也

秋公子友如陳葬原仲

原氏仲名陳大夫也大夫何以葬公子友之舊也何以書友欲往而葬則人臣無私越境於是乎請於公而公命之行也非禮也或曰原仲交乎魯侯魯侯使友會其葬亦非禮也傳曰辟內難也辟內難何以託之葬原仲不知也○杜氏預曰原氏仲字禮大夫既卒不名恐非

說見僖十五年夷伯

冬杞伯姬來

來者歸寧也來歸者大歸也歸寧常事不書非禮書之伯姬來何以爲非禮春會洮矣以是爲亟也禮父母在歲一歸寧伯姬桓公女法不當歸寧故書

莒慶來逆叔姬

莒慶何以名叔姬何以不名婦人稱伯仲禮也何以不言逆女別於爲君逆也莒慶非公事叔姬非夫人何以書公自主

之也凡公嫁女敵者主之非敵者大夫主之自主叔姬非禮也傳曰大夫越境逆女非禮也

杞伯來朝

公會齊侯于城濮

城濮衛地謀伐衛也

二十有八年春王三月甲寅齊人伐衛衛人及齊人戰衛人敗績

稱人將卑師少也伐未有書日者此何以日伐之日卽戰之日也然則何以不於戰焉日於戰焉日則嫌於非伐之日也不徵辭不察罪齊以甲寅之日伐衛以甲寅之日戰不地者於衛也不以齊及衛者戰非齊人之志也凡敗績稱師此稱人何也亦將卑師少也

夏四月丁未邾子貜卒

秋荆伐鄭

公會齊人宋人救鄭

凡救未有不善者

冬築郛

築者始作邑也城者城舊城也

大無麥禾

麥夏熟禾秋成何爲書於冬此不由水旱也非饑也有司歲
杪計國用而曰麥不足也又曰禾不足也故國史書曰大無
也費用無藝爰及耗竭故不曰水旱饑麥一穀禾五穀何爲
一而當五麥續舊與新令民不饑乏故春秋重麥 晉書五
行志云吳孫皓時常歲無水旱苗稼豐美而實不成百姓以

饑闔境皆然連歲不已吳人以爲傷霽非也按劉向春秋說
曰水旱當書不書水旱而曰大無麥禾者土氣不養稼穡不
成此其義也

臧孫辰告糴于齊

何以不言如齊告糴劉氏敞曰先言如齊則詞緩先言告糴
則情急也臧孫辰曰賢者急病而讓夷

二十有九年春新延廩

新者有舊也何以書大無麥禾告糴于齊冬築鄆春新延廩
所謂時詘舉贏者也或曰延廩法廩也僭也

夏鄭人侵許

秋有蜚

記異也或曰災也

蜚爾雅以爲蟲山海經以爲獸劉敞曰負
性不食穀食穀爲災羅願曰負蜚今之

蜚蠊蟲能食稻花使稻不蕃若然是以災書也然負蠊常有經書多不當言有者言本無也劉敞據山海經云蜚狀若牛而白首一目虬尾行水則竭行草則死見則其國大疫是則以異書也然行案爾雅蠊蟲云蜚蠊蠊注云負蠊是也劉向以爲爲蠊與惡蠊卽今所謂臭蠊也劉敞以爲負蠊誤矣劉敞引山海經亦恐誤姑存之

冬十有二月紀叔姬卒

城諸及防
傳曰書時也非也春新延廢冬城諸防雖時庸可乎其言及何也先後之辭

三十年春王正月

夏次于成

秋七月齊人降鄆

次于成何也齊將降鄆故備之不言將不稱師將卑師少也鄆者紀之附庸凡降者自降也降之者脅降也

八月癸亥葬紀叔姬

婦媵不卒卒紀叔姬紀來告也亡國不葬葬紀叔姬魯往會也其來告往會何也錄賢也○方氏苞曰內女書葬禮之變也以爲著其賢非也宋共姬之葬也以卿共葬事而書紀叔姬之葬也以媵而書二姬之賢與葬之非禮其義兩行而不相悖也

說見僖十六年
鄆季姬卒下

九月庚午朔日有食之鼓用牲于社

冬公及齊侯遇于魯濟

傳曰謀山戎也杜氏預曰濟水厯齊魯界在齊界爲齊濟在魯界爲魯濟

齊人伐山戎

稱人將卑師少也傳曰齊侯也貶人之非也○傳曰遇於魯

濟以山戎病燕故然則伐戎爲燕也當書戎伐燕齊救燕如
邢衛之等經壹不言傳未可信疑山戎近燕與齊接壤齊欲
南服楚恐戎議其後故先以兵加耳外傳之言亦近夸辭未
可信也若謂齊侯親伐貶稱人然則伐北戎稱齊侯何以無

貶

見傷
十年

三十有一年春築臺于郎

夏四月薛伯卒

築臺于薛

六月齊侯來獻戎捷

捷者戰勝所獲也伐戎曰齊人獻捷曰齊侯何也齊侯不親
伐及其捷也親來獻之夸魯也非禮也諸侯不相遺俘傳曰
旗獲而過我也非也齊伐戎不過魯

秋築臺于秦

國有臺爲候也逮乎國非禮也一歲而築三焉惟臺是樂而已矣

冬不雨

一時不雨卽書者呂氏大圭曰莊公亟興土功屢見災異故詳志之

三十有二年春城小穀

小穀魯地傳曰爲管仲非也齊自有穀非小穀也卽齊地者

當書城齊小穀如城邾瑕之例

見哀六年

夏宋公齊侯遇于梁丘

傳曰齊侯爲楚伐鄭之故請會於諸侯宋公請先見遇於梁丘宋先齊何也遇則簡禮相見莫適爲主故以爵序

秋七月癸巳公子牙卒

傳曰殺也非也殺則何以不書刺云爲季子諱也非也諱殺書卒非事實也何以傳信乎○內大夫皆卒桓之大夫皆不卒史闕爾莊之大夫亦不卒公子牙特卒廟存爾方氏苞謂聖人削之以示王法所不容非也方氏旣引韓子春秋書王法不誅其人身而復瑣瑣然削其卒以示誅貶何哉削其卒旣與叔彭生之不卒書法相亂且桓宣惡同而宣之大夫皆書卒非春秋誅惡之法也若謂桓之大夫特文見義而餘從其常則春秋誅亂賊何不皆從其常而必每事書之乎又謂桓之篇月不繫王而宣之篇月仍繫王夫王以不討賊削其王然則春秋之王當削者多矣不爲他國不書王而獨爲魯貶其王則是王不王獨繫於魯而不繫他國乎

八月癸亥公薨于路寢

路寢正寢也以正終也范氏甯曰公薨皆書其所謹凶變

冬十月己未子般卒

此弑也何以卒諱也何以名未葬也禮未葬稱子某既葬稱子踰年稱公未葬何以名父前子名也既葬何以不名疑君也所以稱子緣孝子之心也踰年何以稱公成君也所以稱公緣臣民之心也般卒不葬不成葬也國亂故或曰不葬降成君非也雖未成君待之猶君也○方氏苞曰凡子某卒不地不葬者皆故也啖氏助曰未踰年曰卒未成君也子卒而不地葬而不志義與成君同

公子慶父如齊

告立君也傳曰奔非也閔公者齊出也子般孟任所生般死

閔公立故告以自託也

狄伐邢

春秋說略卷三